

Pravosudna komisija Brčko distrikta BiH, na osnovu člana 14. stav (1) tačka n) Zakona o Pravosudnoj komisiji Brčko distrikta BiH („Službeni glasnik Brčko distrikta BiH“, br.: 19/07, 20/07 i 02/08) i odredbe člana 116. Zakona o Sudskoj policiji Brčko distrikta BiH („Službeni glasnik Brčko distrikta BiH“, broj: 03/21) , na ____ redovnoj sjednici održanoj dana ____ godine donosi sljedeći

PRAVILNIK O ČINOVIMA I UNAPREĐENJU U SUDSKOJ POLICIJI BRČKO DISTRIKTA BIH

DIO PRVI – OPŠTE ODREDBE

Član 1 (Predmet Pravilnika)

Ovim pravilnikom utvrđuju se činovi, izgled činova, postupak dodjele i sticanje činova i unapređenje službenika Sudske policije Brčko distrikta BiH (u daljnjem tekstu: Sudska policija).

Član 2 (Usklađenost radnih mjesta policijskih službenika)

Radna mjesta službenika Sudske policije usklađena su sa činovima na taj način što se Pravilnikom o unutrašnjoj organizaciji i sistematizaciji radnih mjesta Sudske policije utvrđuju činovi kao uslov za obavljanje svih poslova i zadataka koje obavljaju službenici Sudske policije.

DIO DRUGI – ČINOVI I NJIHOV IZGLED

Član 3 (Vrste činova)

Za službenike u Sudskoj policiji, utvrđuju se sljedeći činovi:

- a) Sudski policajac,
- b) Stariji sudski policajac,
- c) Narednik Sudske policije,
- d) Stariji narednik Sudske policije,
- e) Mlađi inspektor Sudske policije,
- f) Inspektor Sudske policije,

- g) Viši inspektor Sudske policije,
- h) Samostalni inspektor Sudske policije,
- i) Glavni inspektor Sudske policije,

Član 4 (Izgled činova)

(1) Izgled činova policijskih službenika Sudske policije propisan je grafičkim prikazom koji je sastavni dio ovog pravilnika.

(2) Činovi se nose na način utvrđen Pravilnikom o izgledu i nošenju uniforme i službenim oznakama Sudske policije.

(3) Rameni prišivci za činove su izrađeni od čvrstog platna, opšiveni su četirimilimetarskom tamnoplavom trakom za službenike Sudske policije sa činom sudskog policajca, starijeg sudskog policajca, narednika Sudske policije i starijeg narednika Sudske policije, a sa četirimilimetarskom zlatnožutom trakom za službenike Sudske policije sa činom od mlađeg inspektora Sudske policije do glavnog inspektora Sudske policije.

(4) Zvezdica je na činu s pet krakova, omjera 15 mm i zlatnožute boje.

(5) Grb Bosne i Hercegovine promjera je 25 mm širine i 30 mm dužine.

DIO TREĆI – POSTUPAK DODJELE ČINOVA

Član 5 (Komisija za dodjelu činova)

(1) Radi provođenja postupka i davanja preporuke za dodjelu činova predsjednik Pravosudne komisije Brčko distrikta BiH imenuje Komisiju za dodjelu činova.

(2) Komisija iz stava (1) ovog člana se sastoji od tri službenika Sudske policije i zapisničara koji mogu imati zamjenike.

(3) Predsjednik i jedan član Komisije iz stava (1) ovog člana, moraju biti službenici Sudske policije sa najmanje deset godina policijskog iskustva.

(4) Komisija iz stava (1) ovog člana daje preporuku predsjedniku Pravosudne komisije za donošenje odluke o dodjeli činova za sve službenike Sudske policije.

Član 6 (Odluka o dodjeli činova)

(1) Odluku o dodjeli činova donosi predsjednik Pravosudne komisije na osnovu preporuke Komisije iz člana 5. ovog pravilnika.

(2) Protiv odluke iz stava (1) ovog člana može se uložiti žalba Pravosudnoj komisiji u roku od osam dana od dana prijema odluke.

Član 7 (Uslovi za dodjelu činova)

Uslovi za dodjelu činova su utvrđeni odredbom člana 83. Zakona o Sudskoj policiji Brčko distrikta BiH.

DIO ČETVRTI - UNAPREĐENJA

Član 8 (Osnovni principi)

Postupak za unapređenje službenika Sudske policije u viši čin provodi se u skladu s principima slobode prijavljivanja, jednakosti uslova i jednakih mogućnosti za sve službenike Sudske policije.

Član 9 (Pokretanje procedure unapređenja)

(1) Proceduru unapređenja pokreće predsjednik Pravosudne komisije odlukom na prijedlog komandira Sudske policije.

(2) Odluka o pokretanju procedure unapređenja se oglašava na oglasnoj ploči Pravosudne komisije i sadrži:

- a) sastav Komisije za unapređenje;
- b) kome se predaje prijava, rok za podnošenje prijava, način podnošenja prijava, potrebne dokumente i ostalo što je potrebno za pravilno prijavljivanje.

(3) Odluka o pokretanju procedure unapređenja u činove za koje propisan interni ispit, sadrži i program ispita.

Član 10 (Provođenje procedure unapređenja)

(1) Proceduru unapređenja provodi Komisija za unapređenje (u daljnjem tekstu: Komisija), koju imenuje predsjednik Pravosudne komisije.

(2) Komisija se sastoji od tri člana od kojih su dva člana iz reda službenika Sudske policije i zapisničara koji mogu imati zamjenike.

(3) Komisijom predsjedava službenik Sudske policije s najvećim činom.

Član 11
(Uslovi za članove Komisije)

Članovi Komisije mogu biti:

- a) iz reda službenika Sudske policije sa višim ili istim činom u odnosu na čin u koji se vrši unapređenje;
- b) iz reda službenika Pravosudne komisije – diplomirani pravnik sa položenim pravosudnim ispitom.

Član 12
(Ovlaštenja Komisije)

(1) Komisija provodi proceduru unapređenja.

(2) Komisija može zahtijevati od Personalne službe podatke za koje smatra da su potrebni.

(3) Komisija može tražiti od kandidata da dostave dokumente koji će pomoći pri odlučivanju.

Član 13
(Način rada Komisije)

(1) Komisija radi u punom sastavu, a odluke donosi većinom glasova.

(2) O radu Komisije vodi se zapisnik.

(3) U slučaju žalbe zapisnici se dostavljaju Pravosudnoj komisiji.

Član 14
(Javnost rada Komisije)

(1) Kandidati imaju pravo uvida u zapisnik i dokumenta Komisije koja se odnose na njih.

(2) Na lični zahtjev, kandidatu, u roku od tri dana od dana podnošenja pismenog zahtjeva, dostavljaju se ovjerene kopije dokumenata iz stava (1) ovog člana.

Član 15
(Kriteriji i uslovi za unapređenje)

(1) Kriteriji i uslovi za unapređenje su propisani Zakonom o Sudskoj policiji Brčko distrikta BiH.

(2) Službenik Sudske policije koji ispuni ostale uslove za unapređenje u čin narednik Sudske policije, mlađi inspektor Sudske policije i čin samostalni inspektor Sudske policije, obavezan je položiti interni stručni ispit za unapređenje u Sudskoj policiji.

Član 16
(Interni ispit)

- (1) Interni ispit se sastoji od:
 - a) pisanog testa i
 - b) usmenog ispita.
- (2) Pisani test se sastoji od upitnika iz oblasti osnovne obuke.
- (3) Usmeni dio ispita obuhvata provjeru profesionalnih sposobnosti i rješavanje hipotetički zadanih situacija iz oblasti sigurnosti.
- (4) Program i način polaganja i ocjenjivanja internog ispita utvrđuje Komisija za unapređenje uz saglasnost predsjednika Pravosudne komisije.

Član 17
(Način dostave prijave)

- (1) Kandidati su dužni dostaviti pisanu prijavu zajedno sa svim dokumentima navedenim u objavi.
- (2) O dostavi prijave iz stava (1) ovog člana izdaje se potvrda.
- (3) Prijava iz stava (1) ovog člana mora biti dostavljena u roku utvrđenom u objavi.
- (4) Neblagovremeno podnesene prijave neće se razmatrati.

Član 18
(Posebno unapređenje)

- (1) Prije razmatranja prijava iz člana 17. ovog pravilnika Komisija, na prijedlog komandira Sudske policije, razmatra sve slučajeve posebnog unapređenja u skladu sa Zakonom o Sudskoj policiji Brčko distrikta BiH.
- (2) Odluku o unapređenju iz stava 1. ovog člana donosi predsjednik Pravosudne komisije na prijedlog komandira Sudske policije.

Član 19
(Razmatranje prijava)

- (1) Podnesene prijave Komisija razmatra i u roku od pet dana od dana zatvaranja oglasa utvrđuje koji kandidati ispunjavaju uslove za unapređenje.
- (2) Listu prijavljenih kandidata Komisija objavljuje na oglasnoj tabli Pravosudne komisije, sa naznakom koji kandidati ispunjavaju uslove.
- (3) Za kandidate, za koje je ocijenjeno da ne ispunjavaju uslove za unapređenje, na listi iz stava (2) ovog člana se navode i razlozi neispunjavanja uslova.

(4) Komisija, na osnovu liste iz stava (2) ovog člana, daje prijedlog za unapređenje službenika Sudske policije predsjedniku Pravosudne komisije.

(5) Predsjednik Pravosudne komisije donosi odluku o unapređenju službenika Sudske policije.

(6) Službenici Sudske policije imaju pravo žalbe na odluku iz stava (5) ovog člana Pravosudnoj komisiji, u roku od osam dana od dana objavljivanja liste.

Član 20
(Objavljivanje konačne liste)

Konačnu listu unaprijeđenih službenika Sudske policije Komisija za unapređenje objavljuje na oglasnoj tabli Pravosudne komisije, nakon donesene odluke o žalbama.

DIO PETI – ZAVRŠNE ODREDBE

Član 21
(Stupanje na snagu)

Ovaj pravilnik stupa na snagu danom donošenja a objaviće se u „Službenom glasniku Brčko Distrikta Bosne i Hercegovine“.




PREDSJEDNIK
PRAVOSUDNE KOMISIJE



Safet Pizović

Broj: SuPK-03-____/21

Datum: _____.

PRILOG I – IZGLED ČINOVA

IZGLED ČINOVA U SUDSKOJ POLICIJI BRČKO DISTRIKTA BIH	
NAZIV ČINA	IZGLED
SUDSKI POLICAJAC	
STARIJI SUDSKI POLICAJAC	
NAREDNIK SUDSKE POLICIJE	
STARIJI NAREDNIK SUDSKE POLICIJE	

MLAĐI INSPEKTOR SUDSKE POLICIJE	
INSPEKTOR SUDSKE POLICIJE	
VIŠI INSPEKTOR SUDSKE POLICIJE	
SAMOSTALNI INSPEKTOR SUDSKE POLICIJE	
GLAVNI INSPEKTOR SUDSKE POLICIJE	